

Autism Spectrum Disorder

Un mucha por wordo diagnostica entre e edad di 18 pa 24 luna



ORANJESTAD – Segun minister di enseñanza, Minister Michelle Hooyboer-Winklaar, na Aruba tin diferente informacion ta circula cu mester warda pa un mucha tin 6 of 7 aña pa test y diagnostica autismo.

Pero esaki ta un pensamiento cu mester trece cambio aden. “Early detection”, o sea deteccion, diagnosis y intervencion tempran ta importante y investigacionnan ta muestra cu un mucha por wordo diagnostica entre e edad di 18 pa 24 luna caba, basa riba

cierto indicadornan.

Un condicion

Den cuadro di esaki minister ta boga pa tin mas experticio y mas informacion pa asisti instancianan, specialmente pa scolnan, cu ta traha cu mucha y adultonan cu autism spectrum disorder.

Tin diferente tipo di autismo y mayoria hende no ta para keto y realiza cu autismo no ta un enfermedad cu ta of por wordo cura, pero e ta un condicion cu hende ta biba cune. Consecuentemente, hopi hende no ta consciente



of no ta realiza cu adulto tambe ta sufri di autismo. Tin hende cu kisas pa hopi aña ta lucha cu diferente cos y nan mes no sa cu nan tin autismo. Mas tempran e mucha wordo diagnostica, mas lihe por cuminsa traha cun’e y ofrec’e diferente herment util pa cu su desaroyo, asina ta limita e efecto di autismo y ta yuda e hoben alcanza exito den su vida.

Manera Bon Dia Aruba a publica recientemente cu ministerio di Asuntonan Social, Educacion y Salubridad hun-

to cu Fundacion Autismo Aruba (FAA), Wit Gele Kruis y Autism Speaks USA a reuni pa cuminsa cu un plan nacional pa asina brinda apoyo extra, tanto na e sistema di enseñansa y esunnan cu ta traha den e area aki, unda cu e vision y punto di salida ta cu tur mucha y hoben mester wordo brinda e oportunidad y e hermentnan pa desaroyo maximo di su capacidad y habilidadnan.

Funciona den e comunidad

Segun presidente di e fundacion, Dilma Arends, tin diferente nivel y ningun autista ta mescos; tin experiencianan den exterior, pero tambe na Aruba, unda cu ora brinda un persona cu autismo e hermentnan necesario nan por funciona den e comunidad.

Network: Autism Speaks Arends a splica cu e compromiso di Autism Speaks cu Aruba ta hopi importante. Autism Speaks ta e organizacion mas grandi mundialmente riba tereno di investigacion di autism spectrum disorder.

Loke ta hopi interesante ta e instancia aki su network grandi di expertonan rond mundo cu ta comparti nan conocimiento a base boluntario. Pa medio di Autism Speaks pues Aruba lo wordo asisti cu entrenamiento di e expertonan aki pa entre otro docentenan, mayornan, trahadonan social y boluntarionan.

Pa medio di Autism Speaks tambe ta posibel pa yuda e famia y e autista mes traha riba su capacidad. □